

西園聞見錄

西園閣見錄卷之八十一目錄

外編

兵部三十

勦捕中

往行

王瓊

王守仁

三用

鄭文盛

姜儀

陳克宅

周津

林俊

劉暉

吳□

吳履

潘希曾

陶諧

西園聞見錄卷之八十一

嶺南 張 萱子孟奇甫 輯

兵部三十

勦捕中

往行

王公瓊在本兵時適潮州孝豐縣湯麻九反勢頗倡發浙江巡按御史解冕奏聞朝廷下兵部議公呼賚本人至兵部大言數之曰湯麻九不過一毛賊耳只消本處差數十火夫縛之此何足奏報欲朝廷發兵殊傷國體此御史不職考察即當論罷矣賚本人回浙江傳此語一時皆以湖州江南重地朝廷不肯處分倘賊勢蔓延卒不可撲滅本兵甚爲失策賊人偵知此恣意劫略不設隄備先是戶部爲查處錢糧差都御史許廷光在浙江公卽請密勅許公討之且授以方略許公卽命憲副彭姓者潛提民兵數千餘出其不意乘夜而往賊人方擄掠回聚酣飲

兵適至擒斬無一人得脫者爾時若朝廷命將遣兵彼必負固拒命勞兵費財亦已甚矣晉溪此舉蓋不煩一旅不損一財而地方尋定謀之廟堂之上定數于數千里之外所謂折衝于俎豆者非耶

桶岡橫水左溪諸賊茶毒三省其患雖同而事勢各異以湖廣言之則桶岡諸巢爲賊咽喉而橫水左溪諸巢爲之腹心以江西言之則橫水左溪諸巢爲賊之腹心而桶岡諸巢爲之羽翼時王公守仁提督軍務議曰今不先去橫水左溪腹心之患而欲與湖廣夾攻桶岡進兵兩寇之間腹背受敵勢必不利今議者紛紛皆以爲必須先攻桶岡而湖廣剋期乃在十一月初一日賊見我兵未集而師期尙遠且以爲必先桶岡勢必觀望未備今若出其不意進兵速擊可以得志已破橫水左溪移兵而臨桶岡破竹之勢蔑不濟矣乃決意先攻橫水左溪密切分布哨道令都指揮僉事許清率兵千餘自南康縣新溪入知府邢珣率兵千餘自上猶縣石人坑入知縣王天興率兵千餘自上猶縣自面入令共皆會橫水使守備指揮郝文率兵千餘自大庾縣義安入知府唐淳

率兵千餘自大庾縣尋都入知府季敷率兵千餘自大庾縣穩下入縣  
丞舒富率兵千餘自上猶縣金坑入令其皆會于左溪知府伍文定知  
縣張戩候各兵齊集令其從上猶南康分以過奔衝王公亦親率千餘  
人自南康進屯至坪期直搗橫水以與諸軍會而兵備副使楊璋分守  
參議王宏監督各營官兵往來給餉以促其後分布既定乃于十月初  
七日夜各哨齊發初九日兵至南康初十日進屯至坪使間諜四路分  
探皆以爲諸賊不虞官兵率進各巢皆鳴鑼聚衆往來呼噪奔走爲分  
投禦敵之狀勢甚張皇然已于各險隘皆設有滾木壘石度此時賊已  
據險勢未可近乘夜遂進十一日小餉未至賊巢三十里止舍使人伐  
木立柵開塹設堠示以久屯之形夜使報効聽選官雷濟義官蕭庾分  
率鄉兵及樵豎善登山者四百人各與一旗齎銃砲鈞鑊使由間道攀  
崖緣壁而上分列遠近極高山頂以覘賊張旗幟蕪茅爲數千灶度我  
兵且至險則舉砲燃火相應十二日早兵進至十八面隘賊方據險迎  
敵驟聞遠山頂砲聲如雷焰四起我兵復呼噪奮逼銃箭齊發賊皆驚

潰失措以爲我兵已盡入破其巢穴遂棄險退走預遣千戶陳緯高峯  
分率壯士數十緣崖上奪賊險盡發其滾木壘石我兵乘勝驟進呼嗚  
聲震天地指揮謝靈馮廷瑞率兵由間道先入盡焚賊巢賊退無所據  
乃大敗奔潰遂破長龍巢破十八面隘巢破仙鶴頭巢破狗脚嶺巢又  
破菴背巢破白藍橫水大巢先是大賊首謝志山蕭貴橫等輩以橫水  
居衆險之中倚以爲固聞官兵四進倉猝分衆扼險出禦甚力至是見  
橫水煙焰障天銃砲之聲撼搖山谷亦各失勢棄險走各哨官兵乘之  
皆奮戰而入知府邢珣遂破磨刀坑巢破茶坑巢破茶潭巢知縣王天  
興破樟木坑巢破石王巢都指揮許清破鷄湖巢破楊梅巢俱至橫水  
知府唐淳破羊牯腦巢破上關巢下關巢破左溪大巢守備指揮鄭文  
破獅子寨巢破義安巢破苦竹坑巢指揮余恩破長流坑巢破牛角窟  
巢破斃龍坑巢縣丞高砂若坑巢破赤坑巢破竹壩巢知府季敦破  
上西峯巢破狐狸坑巢破銘廠巢俱會左溪守巡各官亦隨後督兵而  
至是日擒斬首從賊人賊級并俘獲賊屬男婦奪回被擄人口牛馬賊

仗數多其餘自相蹂踐墮崖填谷而死者不可勝計當是時賊路所由皆刊崖倒樹設阱埋簽不可行我兵晝夜涉深澗蹈叢棘遇險絕則懸繩崖樹魚貫而上猿臂而下往往失足墮深谷幸而不死經數日始能出谷兵已至橫水左溪困甚不復能驅逐會日已暮遂令收兵屯劄次早大雨霧咫尺不辨連數日不開乃令各營休兵享士而使鄉導數十人分探潰賊所往并未破巢穴動靜十五日各得鄉導報謂諸賊分陣預于各山絕險崖壁立有棚寨爲退保之計有復合聚于未破之巢者俱不意我兵驟入未及搬運糧穀若分兵四散追擊可以盡獲竊計湖廣夾攻在十一月初一日期已漸迫此去桶崗尙百餘里山路險峻三日始能達者若此中之賊圍之不克而移兵桶崗分備多前後顧瞻非計之得乃令各營皆分兵爲奇正二哨一攻其前一襲其後冒霧速進分投急擊十六日知府邢珣攻破旱坑巢知府季敦守備指揮郊文攻破穩下寨李家坑巢十七日知府唐淳攻破絲第城巢十八日都指揮許清攻破朱雀坑巢村頭坑巢黃竹拗巢觀音山巢十九日指揮余恩

攻破梅伏坑巢石頭坑巢二十日知府邢珣又攻破白封龍巢芒背巢  
知縣王天興攻破黃泥坑巢大富灣巢二十二日縣丞舒富攻破白水  
洞巢本日知府伍文定知縣張戩兵亦至二十四日知府伍文定攻破  
寨下巢知縣張戩攻破杞州坑巢二十五日知縣張戩又破朱坑巢知  
府伍文定破楊家山巢二十六日知府季敦又破李坑巢都指揮許清  
又破川坳巢二七日守備指揮鄭文破長河洞巢連日各擒斬首從賊  
人賊級并俘獲賊屬男婦奪回被虜人口牛馬賊仗數多是日各營官  
兵請乘勝進攻桶崗但桶崗天險四面峭壁萬仞中盤百餘里連峯參  
天深林絕谷不睹日月中所產早穀薯蕷之類足飽凶歲往者亦常夾  
攻坐困數月不能俘其一卒竟以招撫爲名而罷及詳詢嚮導其所由  
入惟鎖匙籠葫蘆洞茶坑十八磊新地五處然皆架棧梯壑夤緣絕壁  
而上賊使數人于崖嶺坐發壘石可無執兵而禦我師惟上章一路稍  
平然深入湖廣迂回取道半月始至湖兵旣從彼入而我師復往事皆  
非便今橫水左溪餘賊皆已奔入其中固難合勢爲守必力善戰者其



冒其績夫謀定于帷幄之中而決勝于千里之外命出于廟堂之上而威加百蠻之表瓊等復爲朝廷國議有人賀且自幸其所遺得以苟免覆餗之戮也及照監軍副使楊璋參議黃宏領兵都指揮僉事許清都指揮行事指揮使鄭文知府邢珣季敦伍文定唐淳知縣王天興張戩指揮余恩馮翔縣丞舒富隨征參謀等官指揮謝昶馮廷瑞董明德同知朱憲推官危壽徐文英知縣陳允諧黃文驚宋瑤陸敞千戶陳偉高睿等以上各官或監軍督餉或領兵隨征悉皆深歷危險備嘗艱難各効勤苦之力共成克捷之功俱合甄錄以勵將來伏願皇上丕彰廟堂之上賞兼收行伍之微勞激勸旣成功庸益集自然盜賊寢息百姓安生則地方幸甚等因具奏正德十三年三月二十八日奉聖旨這賊首藍天鳳謝志山等盤據千百餘里荼毒三省地方基禍稔惡已非一日今王守仁等親臨巢穴運籌調度卒不過萬餘用費不滿三萬兩而兩月之間醜類悉已勦平成功可喜尙差來人陞一級賞紵絲一套新鈔一千貫王守仁先寫勅獎勵有功職員人等該陞賞的兵部都查議了

來說欽此尚書王瓊等議得前賊相連四省累歲逋誅本部見巡撫都御史遷代不常新任都御史王守仁未到深念地方受害日久議奏催令本官作急赴任未幾巡撫江西都御史孫燧果奏大庾縣等處盜賊攻劫城池敵殺官軍本部又經議奏參究查提失事人員及馬上差人督促都御史王守仁到任彼時賊方猖獗擄去職官本官卽能痛懲往事極言招撫之非圖上攻取之策本部又見守仁勇于任事規畫有方故節經依擬覆奏蒙聖明採納既假以提督之任又許以便宜之權本官果能諳曉兵法料敵取勝兵分十哨各自爲戰所向勢如破竹巢穴盡空種類殲滅往年平寇未有用力如此之易而成功如此之速者也皆仰賴皇上聖明英武先機決斷故瓊等幸効一時之愚而王守仁能收萬全之功也瓊等叨任本兵俱係當盡職務詎敢言功王守仁躬督戰陳獲有軍功所當先錄伏望聖明俯照節年平寇陞廕有功官員事例將守仁照例陞職廕子以酬其功其巡撫江西都御史孫燧同心協謀區畫兵餉巡按御史屠僑振揚風紀覈實功罪及原任鎮守江西太

監許滿先于巡撫都御史計議行事克有成功所據各官俱有勞績亦合普加恩典以示激勸其餘有功副使楊璋等候御史屠僑紀功文冊到日卽行議奏請陞賞中間先參有罪人員今既有功亦論功罪多寡應否准贖緣由具奏定奪但賞罰出自朝廷瓊等俱不敢擅擬伏乞聖裁正德十三年四月十八日具題奉聖旨是各官既勦賊成功地方有賴王守仁陞右副都御史并許滿各贍他子姪一人做錦衣衛世襲百戶先參有罪今次有功的也分別明白來說爾兵部累次擬奏方略指授得宜功可加尙王瓊通此着寫勅獎勵

南贛盜賊其在南安之橫水桶崗諸巢則接壤于湖郴在贛州之瀏頭岑崗諸巢則連界于閩廣接湖郴者賊衆而勢散恃險以負固連閩廣者賊狡而勢聚結黨以相援總督王公守仁遵奉勅諭及查兵部咨示方略初議先攻橫水次攻桶崗而未乃與廣東會兵徐圖瀏頭如攻堅木先其易者後其節目正德十二年九月王公守仁議將進兵橫水恐瀏賊乘虛出擾思有以阻離其黨乃自爲告諭且述禍福利害使報効

生員黃表義民周詳等任諭各賊因皆賜以銀布一時賊黨亦皆多感  
動各寨酋長黃金巢劉遜劉粗眉溫仲秀等皆願從表等出投惟大賊  
首池仲容獨憤然謂其衆曰我等做賊已非一年來招又非一次此何  
足憑待金巢等到官果無說我等遣人出投亦未爲晚其時兵力既未  
能分意且羈縻令勿出爲患故亦不復與較金巢等至公乃釋其罪推  
誠厚撫各願出力殺賊立功於是藉其衆五百餘悉以爲兵使從征橫  
水十月十二日已破橫水仲容等聞知始懼計必以次加兵于是集其  
酋豪池仲寧高飛甲等謀使其弟池仲安率老弱二百餘徒亦赴所投  
招求隨衆立功意在緩兵因而窺覘虛實乘間內應王公守仁逆知其  
謀陽許之乃進攻桶崗使領其衆截路于上新地以遠其歸途內嚴禁  
御之備以防其翼外示寬假之形以安其心陰使人分召鄰賊諸縣被  
賊害者皆詣軍門議事旬日之間至者數十問所以攻勦之策皆以此  
賊狡詐兇悍非他賊比其出劫行剽皆有深謀人不能測自知惡極罪  
大國法難容故其所以扞拒之備亦極險譎前次兩經夾勦狼兵二三

萬竟不能大勝後雖敗遜所殺傷亦略相當近年以來奸謀愈熟惡焰益熾官府每以調狼兵恐之彼輒謾曰狼兵易與耳縱謂他來也須半年我縱避他只消一月其意謂狼兵之來不能速其住不能久也是以益無忌憚今已僭號設官奸計逆謀尤非昔比必欲除之非大調狼兵事恐難濟公以爲兵無常勢在變化而制勝今各賊狃于故常且謂必待狼兵而後敢攻此所以不必狼兵而可以攻之也乃爲密畫方略使數十人各歸部集候我兵期則據隘遏賊十一月賊聞公復破桶崗益懼爲戰守備公使人至賊所賜各酋長牛酒以察其變度不可隱則詐稱龍川新民盧珂鄭志高等將掩襲之是以爲防非敢慮官兵也公亦陽信其言因復陽怒盧珂鄭志高等擅兵仇殺移檄龍川使廉其責且趨各賊伐木開路將回兵自瀝頭取道往討之賊聞以爲公實有討之意又恐假道伐之且喜且懼因遣人來謝且請無勞官兵當悉力自防禦之盧珂鄭志高陳英者皆龍川舊招新民有衆三千餘遠近皆爲仲容所脅而三人獨與之抗故賊深仇忌之三人各來告變謂池仲容

等僭號設官今已點集兵衆號召遠近各巢賊首授以總兵都督等僞官使候三省夾攻之兵一至卽同時並舉與我等官爵金龍霸王印信文書一紙粘狀來首公先以諜知其事及三人首時陽怒其造不根之言乘機誣陷且池仲容方遣其弟領兵報効安得有此遂收縛三人將斬之時池仲安之屬方在營見珂入首大驚至是皆喜羅拜懽呼競訴珂等罪惡公因亦陽令具狀謂將并拘其屬盡斬之于是遂械繫盧珂等而使人密諭其意且使珂等遣人歸集其衆候珂等旣還乃發公又使生員黃表聽選官雷濟往諭仲容使勿以此自疑購其所親信陰說之使自來投訴二十日公兵已還賴乃張樂大享將士下令城中今南安賊巢悉以掃蕩而涑頭又皆歸化地方自可以無虞民久勞苦亦宜暫休爲樂遂散兵使各歸農池仲安亦領衆歸報其兄且云盧珂等雖繫于此恐其黨致怨掩爾不虞仲安歸言其故賊衆皆喜遂弛備公使指揮余恩齋曆往賜諭仲容等令毋撤備以防盧珂諸黨賊衆黃表雷濟因復說仲容今官府安緝勞來爾等何不可親往謝况珂等日夜哀

訴反狀乞官府試拘爾等若不至者卽可以證反狀之實今若不待拘而往因面訴之官府必信爾無他而謂珂等爲詐殺之必矣所購親信復從旁力贊仲容然之乃謂衆曰若要伸先用屈贛州伎倆亦須親往勘破遂定議率其麾下四十餘人自詣贛公探知仲容就道密先行屬縣勒兵分哨候報而發又使千戶孟俊先至龍川督集珂等兵然道經剽巢恐搖諸賊則別齎一牌以拘捕珂等黨屬爲名各賊果遮迎復出牌示之乃皆羅拜相送出境後至龍川始發牌集珂等兵衆賊遂不復爲意閏十二月二十三日仲容等至贛見官兵已散街市多張燈設戲爲樂信以爲不復用兵密往覘珂等又果械繫大喜遣人歸報其屬乃曰吾事始得萬全矣公乃夜釋珂等使歸發兵而令所屬官僚次設牛酒日犒仲容等以緩其歸正月三日度盧珂等已至家屬勒兵當已大集公乃設犒于庭先伏甲士引仲容入并其黨悉擒之出珂等首狀訊鞠皆伏遂悉寘獄而夜使人趨發屬縣兵期以初七日同時入巢於是知府陳祥兵從和平都入指揮姚璽兵從烏虎鎮入千戶孟俊指揮

余恩兵從平地水高沙堡入推官危壽知府邢珣守備指揮鄭文知府季教皆以各路入公自率帳下官兵從龍南縣冷水逕直搗下邳大巢而使各哨分路同時並進會于三洲先是賊徒兵已散處至是驟聞官兵四路並進皆驚懼失措乃分投出禦而悉其精銳千餘據險設伏併勢迎敵于龍子嶺我兵聚爲二衝犄角而前指揮余恩首與賊遇大戰良久賊敗王受等奮追里賊伏兵四起奮擊王受後推官危壽所領義官葉芳兵鼓噪而前千戶孟俊兵從傍繞衝賊伏于是賊乃大潰呼聲震山谷我兵乘勝逐兵遂克大巢三洲已破皆奮勇齊進各賊皆潰陳祥兵遂破熱水巢五花章巢姚重兵遂破淡方巢石門山巢上下陵巢邢珣兵遂破芳竹湖巢白沙巢鄭文兵遂破曲潭巢赤唐巢季教兵遂破古坑巢三坑重是日擒斬首從賊級俘獲男婦牛馬器仗數多其餘墜崖填谷死不可勝計是夜賊復奔聚未破巢穴早乃令各哨官兵探賊所往分投急擊初十日陳祥兵破鐵石障巢羊角山巢獲賊首金龍霸王印信旗袍邢珣兵破黃田坳巢姚重兵破岑岡巢余恩兵破塘合



洞巢溪尾巢初十日孟俊兵破大門山巢危壽兵破鎮里寨巢十一日  
邢珣兵破中村巢郊文兵破半遷巢都坑巢尺八嶺巢季毅兵破新田  
遷巢古地巢余恩兵破空背巢舒富兵破旗嶺巢頓岡巢十三日孟俊  
兵破狗脚坳巢水晶洞巢藍州巢十六日危壽兵破風盤巢茶山巢又  
各擒賊首從首級并俘賊屬男婦牛馬器仗數多然各巢奔敗之賊其  
精悍者尙入百餘徒復哨聚于九蓮大山扼險自固公看得九蓮山勢  
極高巨數百餘里四面斬絕我兵旣不得進而其內東接龍門山後諸  
處賊巢以百數賊若奔往其間必誘激諸巢相連而起勢益難制因得  
賊所屯據崖壁之下一道可通然賊已據險自上發石滾木我兵百無  
一存全于是乃選精銳七百餘人皆衣所得賊衣佯若奔潰者乘暮直  
衝賊所據崖下瀾道而過賊以爲敗散之黨皆從崖上招呼我兵亦佯  
與應賊疑不敢擊及已度險遂得扼斷其後路次日賊始知爲我兵併  
勢衝敵我兵已據險從上下擊賊不能乃退敗公度其必潰預令四路  
設伏以待賊果分隊潛逃二十五日陳祥兵覆賊于五花陣邢珣兵覆

賊于白沙余恩兵覆賊于銀坑水二十七日姚璽兵覆賊于烏虎嶺危  
壽兵覆賊于中村季敷兵覆賊于北山又戰于風門奧其餘散殘黨尙  
三百餘徒分逃上下坪黃田坳諸處各哨官兵復粘踪會追二月初二  
日知府陳祥兵復與賊戰于和平初五日復戰于上坪下坪初八日推  
官危壽指揮余恩兵復與賊戰于黃田坳十二日知府陳祥兵復與賊  
戰于鐵障山十四日縣丞舒富兵復與賊戰于乾村又戰于梨樹十六  
日知府邢珣季敷兵復與賊戰于笏竹湖二十三日縣丞舒富兵與賊  
戰于北順戰于和洞二十六日守備郝文兵復與賊戰于水源戰于長  
吉戰于天堂寨連日擒殺首從賊人賊級數多三月初三日據鄉導人  
等四路爪探又皆以爲各巢積惡兇狡之賊皆已擒斬略盡惟餘黨張  
仲全等二百餘徒其間多係老弱及遠近村寨一時爲賊所驅脅從惡  
未久之人今皆勢窮計迫聚于九蓮谷口呼號痛哭誠心投招公遣有  
生員黃表往驗虛實果如所探因引其首甲張仲全等數人前來投見  
訴其被脅不得已之情量加責治隨遣知府邢珣往撫其衆籍其名數

遂安插于白沙初七日知府邢珣等稱我兵自去歲二月從征閩寇迄  
今一年有餘未獲少休今幸各巢賊已掃蕩餘黨不多又蒙撫順招安  
况今陰雨連綿人多疾疫兼之農功已動人懷耕作合無俯順下情選  
師息衆及義官葉芑并各鄉村居民亦告前情公因親行相視險易督  
同副使楊璋知府陳祥等經理立縣設隘可以久安長治之策留兵防  
守而歸蓋自本年正月初七日起至三月初八日止前後兩月之間通  
共搗過巢穴三十八處擒斬大賊首二十九名顆次賊首三十八名顆  
從賊二千零六名顆俘獲賊屬男婦八百九十三口奪獲牛馬一百二  
十三隻匹器械賊仗二千八百七十件把賊銀七十兩六錢六分按池  
仲容等荼毒萬民騷擾三省陰圖不軌積有年歲設官僭號惡滔天  
比之上猶諸賊尤爲桀驁難制蓋上猶諸賊雖有僭竊不軌之名而徒  
惟劫掠焚燒是嗜至于剽頭諸賊雖亦剽劫擄掠是資而實懷僭擬割  
據之志故其招致四方無籍隱匿遠近妖邪日夜窺圖漸成奸計兼之  
賊首池仲容仲安等人皆力搏猛虎捷競飛猱兇惡之名久已著聞四

方賊黨素所向服負固恃頑屢征益熾前此知其無可奈何亦惟苟且招安以幸無事其實無救荼毒之慘益養奸宄之謀前此亦常夾攻二次計勦數番以兵則前者強而今者弱前者數萬而今者數千以時則前者期年而今者兩月以費則前者再倍而今者十一然而計功較績顧反有加于昔者何哉責由朝廷之上明見萬里洞察往弊處置得宜既假以賞罰之權復假以提督之任既以兵忌遙制而重各省專征之責又或事各牽掣而抑守臣干預之請授之方略而不拘以制責其成功而不限以時以故詔旨一頒而賊先破胆奪氣咨文一布而人皆踴躍爭先効謀者知無阻撓之患而務竟其功希賞者知無侵削之弊而畢致其力是乃所謂得先勝之算于廟堂收折衝之巧于樽俎實用兵之要道制事之良法也事每如此天下之治有不足成者矣

武皇帝時南贛汀漳等處俱有山越憑險阻爲亂郡邑苦之乃擢王公守仁都察院右僉都御史巡撫其地守仁至則先行十家保甲法務使奸無所容又以高皇帝訓勅其父老子弟賊聞而易之弗爲慮也而守

仁左右及麾下將校至郡邑輿臺之類又多爲之耳目守仁微得老隸最黠者致密室而脅之曰汝自知當死否肯爲極言賊情實吾貸汝隸迫則盡吐賊情實守仁笑而貸之乃故爲不可測意在此則示以彼或更在彼則示以此每令形家者擇吉日出師則復止之或將發復不果以多方誤賊而陰勒諸兵備道募選郡邑材官力士以三之一赴軍門使與舊兵參而身教之擊射明賞罰以勵之時初戰破賊于長富村追之至象湖山會閩廣兵至且大合賊迫潰圍而出指揮軍桓縣丞紀鏞戰死諸將懼請俟狼兵至而後大舉守仁怒責之曰戰小挫何損且兵豈不足耶而需狼兵乃親率所選士進屯上杭佯諭諸道姑以牛酒犒師使小息俟秋而再舉諜知賊懈卽分兵爲三路約以同夕擣枚進中軍奪象湖之隘方大戰而奇兵乘間發遂大破之閩廣兵亦盡破其巢四十三所斬獲大酋詹師富等七千有奇賊屬牛馬輜重無算捷上因請立崇義縣治盡得賊之要害地而耕之報可加歲俸一秩賜銀幣而前是守仁謂巡撫權輕不足以控壓諸道因上奏云古者賞不踰時罰

不後事過時而賞與無賞同後事而罰與不罰同况過時而不賞後事而不罰其何以整齊衆心鼓舞士氣誠得以大軍誅賞之法責而行之于平時假臣等令旗令牌便宜行事如是而兵不精賊不平臣無所逃死大司馬王瓊讀而嘆曰不與此人權將誰與也覆奏改提督軍務兵馬糧餉悉聽便宜區畫用兵進止不必奏聞文武官逗遛不用命者聽以軍法從事于是守仁得益展材用立兵符申約束且爲文撫諸賊詞旨悱惻懇至而賊酋黃金巢盧珂鄭志高等相率皈命矣已遂進兵破橫水賊擒其大酋謝志珊等五十六酋斬從賊二千一百餘級俘賊屬二千三百餘人因使諭桶岡賊方狐疑未決乘其懈襲擊復破之擒大酋藍天鳳等三十四酋斬從賊千一百級俘賊屬數如橫水時剽頭賊尙強而其酋池大鬣等尤黠桀故與盧賊珂等仇守仁使使以牛酒諭降之乃報曰大鬣等欲歸死而盧等將乘隙而掩我家室今者不解甲以自保耳守仁乃陽移文責珂志高等而珂志高等急上變謂大鬣等實挾詐以老我王師且列其亂狀守仁復陽怒杖責盧珂等下之獄而

諭之情復以新曆給大贛等且諭使來見大贛乃語其腹心曰欲得伸必先屈贛州伎倆我亦欲先勸之遂以其驍勇九十二人裹甲來見守仁爲慰諭宴犒之館于祥符宮使更新衣習禮供帳儲餼甚辦大贛等喜過望至正元之次日守仁張樂大宴伏士以待引大贛等魚貫入卽戮之庭無一脫者遂出盧珂等于獄使之歸發兵爲鄉導夜半守仁出師與之會遂破淵頭石門復破其巢三十餘擒大賊五十八鹵斬從賊二千餘餘奔九蓮山守仁以九蓮深險不易攻乃使精卒七白衣賊衣佯若奔潰者賊從崖上呼喚與相應久而賊覺之則師已度險矣賊狼狽失據大軍蹙之皆就縛守仁旣以盡得賊地相險易增設和平縣治如初

貴州地扼塞險阻林箐蒙密易藪匿爲寇諸苗生長山谷性驚悍嗜殺守臣或時科擾猶民多因緣爲姦利故諸苗輒相煽爲亂正德十一年時青平衛車枕等寨苗反其苗阿傍阿皆阿華皆僭稱王據香爐山爲巢穴糾合苗衆焚劫居民蔓及興隆偏頭平越新添龍貴諸鎮道阻不

通巡撫都御史曹祥同鎮巡諸臣檄諸路兵以都指揮周吉部領參議  
蔡潮監視且勦且撫會祥遷秩去都御史鄒文盛代諸苗負固不聽撫  
事聞上下重書命文盛勦之別勅湖廣巡撫都御史秦金總兵官金英  
以兵會文盛檄湖廣四川兵未至先集貴州兵以參政胡濂參議蔡潮  
都指揮潘勳指揮余大倫各監統諸將進擣砲木寨伏兵計擒賊首阿  
革進擣羅襪寨擒賊從阿二阿黎正德十三年指揮滿弼王言金章等  
率遊兵巡徼遇苗賊衆三百餘人自香爐山突出至大岐岐弼等四面  
邀擊殺賊五十餘人賊退奔據白崖無何副總兵李瑾帥湖廣兵至貴  
州程番安順諸路及四川播州酉陽兵俱先後至又募土兵亦集文盛  
等乃相賊巢險易分兵五哨命參將洛忠都指揮劉麟陶霖王壘總鎮  
□臺陽淮許詔各統領使副使李麟參議蔡潮僉事許効廉詹源各監  
視參政胡濂督餉布政使趙文奎轉運指揮余大給率遊兵策應總兵  
官李昂副總兵官李瑾駐師要害地應援文盛與太監李鎮居中節制  
調遣御史周文監紀驗功次諸將分道刻期以某日進抵香爐山夾攻



之山四壁立陡絕高險惟隘路五處透迳上賊皆築些柵守禦官兵稍近則木石毒弩俱下官兵用火銃焚其寨柵賊隨以水沃滅之諸將仰攻數日不能克乃以意製鐵苗爬山虎繩梯等具督令宣慰彭九霄彭明輔等揀精兵附上下緣崖猿攀相引上拔其外柵縱火焚賊廬舍三十餘間擊斬百餘人賊死戰禦之兵不得深入遂斂衆退復採木製陽橋戰樓高與賊寨埒約樓近可攀登者會夜分雷雨大作諸軍規賊不備昇前攻具附崖土兵先登官兵繼之斬關拔柵入縱火焚賊廬舍烟焰蔽天四面夾攻至天明賊不能支乃退奔入後山復據險爲寨後山峻隘尤甚諸將督兵進駐重險間二十二日乃復兵崖下令都指揮王言同嚮導陳良等山半誘之賊衆持鏢弩下山迎敵號舉伏兵四起接戰數合賊復奔據山絕頂拒守益堅諸將用嚮導土人探知賊山後頗有林木藤蘿可懸拽梯鉅數處乃先遣人入寨與約至日令百戶邵剛吳隆于山前招賊酋與語撫之使命往復故延久賊果聚衆前山觀聽山後備弛諸將乃督兵以攻具附所探諸處齊登賊衆覺倉猝拒戰官

兵已奪險遂奮擊賊不能禦乃大潰官兵乘勝入擣崖峒擒賊首阿傍等斬首及俘獲甚衆

姜儀字君肅號侑溪南昌人正德甲戌進士歷官右副都御史嘗爲湖廣副使任彬桂時洞庭寇大爲民害公令魚艇悉爲保甲而出己案贖贖費代爲課輸賊起聽其蟻附而擊之寇之所有盡以償勞官司不問由是衆心競勸遵公約束計不勞而湖水陸平矣

陳克宅字卽卿餘姚人正德甲戌進士嘉靖十四年任湖廣左使巡撫貴州先是都勻苗阿向與土官王仲武爭田構殺仲武出奔阿向遂據凱口圍爲亂圍圍十餘里高四丈四壁陡絕獨一徑尺許曲折而登上有天池雖旱不竭積糧可支五年變聞克宅與都督僉事楊仁調水西兵勦之宣慰使安萬銓素驕抗不法邀重賞乃行提兵萬餘屯圍下相持三月仰視絕壁無可爲計獨東北隅有巨樹斜科偃蹇半壁間然去地二十丈許萬銓令軍中曰能爲探上絕壁者與千金有兩壯士出應命乃鍛鐵鈎傳手足爲指爪人腰兩徽一劍約至樹憩足卽垂徽下

引人帶銃砲長徽而起候雨霽夜昏黑不辨咫尺時爬緣而上第微聞刺刺聲俄若崩石則一人墮地骸骨泥爛矣俄而長徽下垂始知一人已據樹乃遣兵四人緣徽蹲樹間壯士應命者復由樹間爬緣而上至回頂適爲賊巡檄者鳴鐸而至壯士伏草間俟其近揮劍斬之鳴鐸代爲巡檄者賊恬然不覺也垂徽下引樹間人樹間人復引下人累累而起至圍者可二三十人便舉火發砲大呼曰天兵上圍矣賊衆驚起昏黑中自相格殺死者數千人奪徑奔下失足墜崖死者又千人黎明水西軍蟻附上圍克宅令軍中賊非格鬪而擅殺及黎明後殺者功俱不錄自是一軍解體相與賣路走賊阿向始共其黨二百人免圍營一空焚其積聚乃班師而以三百官兵戍圍月餘阿向復糾爛土黑苗襲圍盡殺官兵克宅欲勒兵勦之時僉事田汝成飭兵恩石聞之乃獻書于克宅曰凱口餘孽復肆猖狂竊料今日賊勢與昔殊科攻伐之策亦當有異往者一二梟獍負其窟穴草竊爲奸者皆內儲糠糧外翼黨與包藏十有餘年迺敢陸梁以延歲月今者諸賊亡命之餘憂在溝壑冒萬

死一生之計謹呼而起非有旁寨渠首通謀結納擁羣醜以張應援也  
守彈丸之地踰伏其中無異瓊缶襍升斗之糧躡尺五之道束腓而登  
無異哺穀非素有紅粟朽貫積之倉庾廣畜大豕肥羊以資擊剝也夫  
此二者爲必敗之形而欲攝朽腹張空拳睥目而前以膺貔虎是曰刀  
鋸之魂不足慮也然竊聞之首禍一招而合三四百人課其十日之糧  
亦不下三四十石費亦厚矣而踰旬不餒無乃有間道捷徑默輪潛輓  
以給其中者不然何所恃以爲生也夫蠻陬夷落之地事異中原譬之  
禦寇于洞房委巷之中搏擊無所爲力故征蠻之略皆廣列伏便扼險  
趣高四塞以困之謂之得地若我遶其險而彼乘高順勢強弱之勢已  
懸倍屢是以諸賊雖微亦未可以蓐食屠剪也惟在據其要害斷其芻  
粟之塗重營密柵勤其間規嚴壁而居勿與角利使彼進無所乘退無  
所逸遠不過一月而羸疲之屍棄陳麾下矣若夫我軍旣固彼勢益孤  
食竭道窮必至奔突則潰圍之戰不可不鑿也相持旣久觀望無端我  
忽而衰彼窮而銳或晨昏情臥刁斗失鳴則劫營之虞不可不備也防

禦既周奸謀益窘必甘詞納款以丐殘息目前雖可安帖他日必復萌  
生則招撫之說不可從也庸見宵人狃于說道欲出其不意以徼一獲  
彼既鑒于前車我覆襲其故轍不惟徒費抑或損威則偷固之策不可  
不拒也茲數者雄略必有成算而疏腐之識敢効區區者休戚同情不  
敢避越俎之嫌至于事平之後經畫猶煩夫凱口雖微亦祥荆之巨阨  
也崇山密箐磴道迫隘兵不得橫鉅人不得並躅迺遣一二眇小之官  
提數百不練之卒星散其間豈能持久往者爐山之變亦甚縱橫幸蒙  
前例刊木鑿賈夷其險棘開屯設所經營數年始得寧謚則今日凱口  
之議似不當出爐山之下也土官王仲武始以綿弱失其疆場頌蒙上  
官之力以保宗祧雖百口捐軀猶難報稱迺今哄然而稱逆者固其部  
落之遺也既不能宣布德化俾彼投戈又不能率其左右心腹之雄先  
鋒効力是爲失職之臣與叛逆無異若復仍其名位錫之土田是右姦  
而獎亂也竊論此人當褫爵削職移其族屬列之氓伍開設縣治衛以  
軍屯若以勢有不行法姑稍假亦當暴其罪過聲諸市闐重加懲罰庶

咸振法覃協人心而伸國法也克宅閱書不省集三省問計參將李宗祐曰是未可以猝破也曩賊負固久矣屢招屢叛徃以爲常故渠魁無必死之心黨與有求生之望觀隙掩取以計勝非力剋也迺今諸賊懲于剗衄之餘慣喋而集棄殊死以待我我軍新罷負擔未弛勞勩未舒強馳而起之氣鼓不作以棄死之虜桀強使之軍難以濟矣克宅笑曰君何怯也吾將乘一騎勒一人五日而取之宗祐曰公言何易公獨不聞窮寇者勿逼乎一盜橫戈于市則萬人辟易非一盜能僞萬人也必死與有生非僞也故利有所不角害有所不傑知己知彼百戰不殆迺今彼我不偶矣故曰是未可猝破也克宅曰兵貴拙速不奇巧遲故避實擣虛桀勝者馳控銳者披譬之破竹有餘刃矣緩之賊且完壁儲餉益難爲功宗祐曰不然兵法有之奸謀而成恭敵無泄故將不可驕而勝不可狃也蒲騷之役卒狃莫敖定陶之師竟驕武信公欲以破竹之勢方之乎吾以爲未若強弩之末不能穿魯縞也克宅艷然曰李君一何管蒯我也乃強檄宗祐宗祐不得已以軍往賊果殊死繫我軍我軍

敗績賊遂擁宗祐去克宅大懼以千金賂賊贖宗祐出之事聞克宅調應天聽勸勅安萬銓勦之萬銓乃招阿向許以不死責王仲武均其田而亂始息

周布政津嘗爲瑞州府太守先是上司凡盜起必責捕盜官緣此畏罪不以聞釀成大患公上書巡視都御史林公俊謂寬巡捕之法重獲盜之賞盜乃可弭謂漢時郡國多盜聽其自相斬獲以除其罪吏逗遛回避者勿論惟以擒討爲効此策今正宜用林公從之其後賊首王武果擒其黨劉洪等若干人林公深加嘆賞久之訛傳將劫獄一日報三四至官吏士民奪竄一空獨公與捕盜通判甘文紹堅守不動號召民兵以爲扞禦且遣卒入獄防變文紹家僮殺死囚四十七人時有銜公者遂加羅織文紹亦因以歸罪于公坐是繫獄兩易寒暑自以身爲正官宜獨任之無一語以及文紹瑞民擊登聞鼓訟冤專下兵部司馬劉公大夏覆奏得旨還公原職

林司寇俊正德□□年嘗巡撫四川時藍鄙之寇方劇公陳師鞠旅頌

軍令數四將致賊而擒之忽報賊將攻保寧巴州卽取道救之猝遇賊于華壘單騎直抵其巢宣朝廷德意示以禍福賊頓首伏地公曰吾擒汝賊羅拜而謝約日請降旣而淫雨溪壑賊失期疑阻遂分黨將謀據州縣要害川兵脆不能支公取將領等命斬以徇旣而貸之諸軍股栗皆願立功自贖于是連戰皆捷賊衆披靡人畜死者相枕籍渠魁多授首捷聞降勅獎勵時兩川所在皆賊衆四十餘萬公督兵追勦凡戰皆捷擒斬數千級俘獲無算已而江津賊曹甫復起公聞報馳赴辛未元日乘賊醉無備乃夜半蓐食銜枚而往圍而燒之遂斬曹賊前後所得賊級又千數百人

正德七年五月賊劉六等渡叢林夜渡邳纒三百人遂奔河南從光山確山奔上湖廣棄馬登舟沿江掠聚其黨復盛至七百人賊至陽邏圍風湖廣巡撫都御史馬炳然攜家赴官賊遇之于爛泥鋪脅與俱至南京馬怒罵之遂遇害虜其家人旣而劉六爲風折檣擊死于水其幼雛數人亦死惟劉七齊彥名泝流劫掠八月劉香等仍泊狼山下其黨以



失地利相怨或潰逃去劉七與其妾丁氏阮氏兢二婢乘劉醉逸入通  
州守兵執之賊令狼山寺奴持書來索婢不與遂率衆二百餘來攻我  
軍擊之賊退入船是夕大風發舟數掀播晝夜不息風烈甚數十年所  
無賊船皆解散飄墮僅存八船其衆顛踣不支賊在船不能坐臥自相  
擊撞嘔穢狼藉互相怨詬已有自戕之謀蘇人有應募獻計用火攻其  
名水老鴉藏藥及火于礮石中發之又爲具名如烏喙持之入水以喙  
鑽船而機發之以自運轉透船可沉試用之已破丁船乃米舸不曾傷  
賊退將復爲之賊檢察知之謂江南兵能水中破船是神兵也益駭絕  
乃登山團聚或下崖散遁輒爲通州諸處守兵所蹙通州最與賊密切  
而守吏亦特嚴整夜三更副總劉輝帥遼東兵千總官任重帥大同兵  
遊擊卻永帥宣府兵與諸從校並進與守兵齊集未刻與賊戰我軍聲  
鏖震天風火交熾賊披靡躋山顛古垣憑高控險鎗矢瓦石雨下鏖戰  
賊初不識山路火勢旣偏僧行居人逸出賊或從之上下得路而我軍  
方奮勇倍前日加申劉副總引其部將張椿蕭澤高雲李春美饒徵等

誓死決戰分軍爲三劉在山北卻在山南皆戴盾跣行而上手施鎗礮且上且攻盾上矢集如蠟將士有被數箭死數人者不退遂奪其垣賊墜崖死者無數其餘先已具詐蘆山下以備竄逃至死覓嬰谷下山欲上船而船中人已滿不容入進退無地劉副總兵列岸下百矢齊發官艦中亦驟矢并集劉七勢急遂赴水死彥名爲宣府遊兵十旗張鑑取首劉副總兵擒斬餘賊誠截沉水賊級有逸而北者高雲追斬之皆盡已夜息兵甲午旋師高岱曰國家二百餘年盜賊倡亂未有甚于此寇者侵薄兩畿蹂躪數省雖漢黃巾何加焉其卒盪定者祖宗之澤慶天命之眷祐耳當時諸臣所以控制之略未見有持必勝而得萬全者始焉馬中錫張偉固已失策玩寇而繼之陸完谷大用毛銳等視中錫輩何彼此耶成敗遲速幸耳及中錫等下獄論死而完等封拜崇顯是烏足爲賞罰耶要之摧敗賊鋒者諸邊卒之功而勦捕盪平者各守臣之力其馳騁中原身當其難則彭澤之勞勩似不可誣而皆賞格所後也雖然幸賊無豪傑遠圖耳使二寇據形勝按紀律相爲犄角豈完等之

所能制哉若去鈞州城不攻而入泌陽掘焦芳先墓則公論在盜賊亦  
有之執謂其無良心也

連江吳公□□既卽家起拜御史大夫兼少司馬盡護嶺東西諸將公  
至軍悉集諸將策先其重者于是嶺右之府江大同江搖與王樂昭平  
永安荔蒲之搖構而爲亂已金鶴松栢深埔之搖復繼亂公前後發兵  
蕩平之斬首垂二千俘賊屬三百有奇聽撫者千餘業已奏聞膺上賞  
諸搖服公之威神而感其德只咸祿面拱手以請旦一夕之命而獨嶺左  
之惠州曰岑岡其先故剽寇池仲容之支藪也當王文成公守仁之誘  
擒仲容也悉殲其黨二十四巢而獨岑岡之一巢最險遠不可下王公  
業使就撫取羈縻而已巢之酋曰李鑑鑑死其子文彪繼之以詐力驅  
使諸巢亡敢不服而有所任以爲謀主者曰江月照尤嶺黠嘗出劫掠  
敗王師執倅司理萬戶以去南贛之持節者討而僅勝之文彪跳九蓮  
山失妻子尋還故巢鳩其亡散復振官爲歸其妻子乃稍定文彪死月  
照妻其故妻子其子威焰踰于文彪時嘗縛鞭郡倅之接壤者已剽劫

商緝已又多戮其黨之自遠者專稍稍露吳公怒曰操爾搖敢干天子之威命以荼毒我生靈謂惠州守黃時雨汝司察治月照聞而懼遂稱兵以其紀綱之僕據隘喉咽之其旁寨之有力者羽翼之優巧者耳目之守廉得其狀以聞公公乃屬藩參顯臬副某守時雨將軍夢鯉等練卒蒐乘分布要害曰胥後令仍屬藩參及守縣購傍寨曰棄月照自歸者赦而罪能以月照來者軍正議賞賞同首功諸寨響應縛月照道服毒死致其尸餘寇李珍等因成資據險自固時時出剽掠公檄諸軍夾攻賊度勢不支由間道出江西之龍南定南等處師尾而急擊大破之俘斬二百四十有奇餘墜崖墜死者不可勝數捕脇從千五百人皆釋弗誅設賊田幾五千畝以予屯卒捷聞吳公及諸君賞賚有差惠州守與其父老相語桶岡四塞天險爲諸夷最以王文成之宏略擁百勝之兵乘破竹之勢而不能得志于彈丸赤子之地六十餘年來其人不復知有三尺法甚者如夜郎王謂漢孰與我大也吳公不費尺刃斗糧坐縛其兇酋如一孤豚而後揚兵脅諸黨衆俟其出而尾擊之百世之業

穴一旦而盡空然不以多殺爲績俾千五百人之脅從悉保其首領何  
吳公之智且仁也

吳知州履嘗爲安化令安化隣右三苗其土豪多糾民爲兵旣盡降爲  
萬夫長易俊原獨特驍勇與麾下數十人遁入山谷保險自固郡邑患  
苦之江陰侯吳良承詔求餘寇已移檄旁縣兵且集召德基計事德基  
曰易氏未有反狀奈之何檄之使生變乎不若先以計致之果反用兵  
未晚也否則出兵無名民先受其害矣願君侯熟慮之侯曰令之言然  
吾爲令徐之德基乃屏吏卒步至山谷中抵俊原家家空一老人出待  
客德基謂曰易俊原出見江陰侯則無事矣今不出大兵且至一縣民  
皆爲齋粉然殺一縣父兄弟者易俊原非縣令也老人曰俊原必出  
惟明府哀憐之德基謬曰俊原或未肯來得其子及麾下三四人先往  
可免矣明日其子及麾下至如德基言兵不發旣而盡致其麾下惟俊  
原一人度兵勢孤乃招之曰君侯願與俊原相見俊原喜詣軍門請見  
遂縛送京師事平軍民安堵無擾

潘少司馬希曾嘉靖乙酉嘗提督南贛軍務時瀏頭餘黨曾蛇仔等七  
巢並興大肆毒痛遠近震恐公發諸路兵夾勦賊大懼願搃且變通判  
董鳴鳳以要公曰此賊故智耳昔人常墮其計容復陷乎乃下令曰通  
判自債事不足恤有能掖之出于弗死益督進兵力戰賊大敗渠魁生  
擒俘誠千餘牛馬器械獲其衆餘黨奔竄于是犁其庭籍其田業貧民  
審其脅從者分配內道通判卒獲全公制變法機奇中折衝樽俎之間  
而親臨戰陣者咸弗若也至上功獻捷初弗張皇謂臣子効勞期于成  
事而已希賞非所志也故紀述勞動多歸之人其俘獲稍涉疑似即不  
以報會據吏白故事宜納賂不者功雖高不賞公曰我寧無功耳奏上  
會召爲工部右侍郎迨論功竟弗及焉

陶少司馬諧嘗提督南贛等處軍務時連州大帽楊旗等山諸賊據天  
險結石棚懸滾木機毒矢兵至如雨下不可近公選銳卒二百婦人服  
挾短兵背繫竹筒貯火藥具以爲號夜援藤上揚旗焚廬舍草木大兵  
鼓噪山下聲震天地賊驚潰相蹂擊二百人從中作之遂盡破大帽嚴

塘等諸寨殺僞無敵王文興隆僞都督總兵林宗福等有名賊首三十級擒斬千九百七十七名顆俘獲千一十七名口投降新民三百八十三戶公總督四年餘凡六出師皆大捷每發兵諸將授方略而行及其成功也不爽毫髮誠所謂沈謀可以掩著蔡勝氣可以奪鬼神矣百餘年來言平寇者未有若是之速而獲功之多者也國有彝典卽封拜不爲過否亦得進秩序庶乃僅僅酬以金帛而已人言當路者以公恃功弗求疑于慢乃廢兩廣缺總督擢公少師馬兼台秩往蒞之先是羣盜益憑恃險阻聯絡州縣甚至僭號署僞官不知有朝廷矣數十年不能平公至召諸爲賊苦熱彼中狀者密訪之更遣幕下敢死士俱與遍入賊巢盡圖其險易虛實以歸公一覽賊在目中曰不難也但念海賊忽無定須先勦之乃作灣尾巨舟于番禺海濱計必來焚我新舟伏水飄兵以待賊果至大破之溺海死者過半殺賊謀主陳邦瑞于波羅廟餘散去許折桂窮蹙乞降得丁壯千八百有奇分遣之乃征平南破石馬仙台花相等山寨擒斬雷公招渠魁百三十六名顆生得四千五十

一名口潯州以寧時壬辰八月也于是親督兵悉力于東西山按圖刻期四路分擊使不得相救盡破巢寨一百二十五處擒斬趙林花等有名賊首八十三級斬獲從賊七千五百有奇德慶陽春等寇悉平分屯設守而還甲午勦瓊州黎佛二等一百四級降從賊一千一百一十有奇撫處巢峒五論者以朝廷報功未稱不知公盡職爲安豈望恩澤哉



西園聞見錄卷之八十二目錄

外編

兵部三十一

勦捕下

往行

蕭東潭

姚鏞

茅坤

張岳

龔輝

應楨

殷正茂

劉顯

劉自強

章熙

許應元

楊逢春

熊桴

劉廷

陸穩

吳文華

史記勳

朱英

西園聞見錄卷之八十二

嶺南 張 董子孟奇甫 輯

兵部三十一

勦捕下

往行

蕭方伯東潭公嘗知瓊州至瓊值黎佛二之變往歲瓊人犁田而懼其逼聚兵護耕歲四更番率五百人兵寄溪洞半疫死而黎數出攻劫莫制至是賊二殺官吏擄村堡勢張甚督府欲以大兵蹙之公曰擄係未歸而急之是促其死也吾且觀之兵而攜其黨庶可乎乃遣人招降十八村至則厚其餼勞善諭之察其尤雄桀者倍與衣服器物寄心腹語令歸所虜生口別授方略密擒佛二以自效佛二素雄桀手挽彊弩三百斤人莫敢近降者既受戒慮賊逸無以解口乃陰導兵官設伏諸隘而身給佛二以走俟稍倦分負其刀弩諸械旋走隘至則伏發因成擒

佛二既得以大兵綴之諸酋恐奉約束輸稅者四百餘戶歲省防兵二千計永淳令激淥里賊爲變且薄賓州公爲右江兵備以兵請于督府不聽因自計曰此斷之我者也既謀其虛實出沒而是時思恩土兵適罷古田之役遂檄以從更摘他兵佐之據險深索殲潘公廣韋公抱等一百七十有奇俘老幼六百籍所捕獲給軍餉而出其羨以報督府督府口雖壯之實嫌其異己不以捷聞公在瓊擒佛二無所序至是復見沮抑一不爲意且欲乘勢以兵臨入寨招藍昇降入寨本南丹屯地爲搖所據朝廷分隸土酋羈縻之然恃險遠數出爲患至是藍昇聞淥里之捷自懼禍及因請內附當事持勦撫守三說不能決公上議以爲受其降而襲之兵減贖而疑衆信其降而忘其備法弛而招侮先以撫守二說俟有他變徐制其後可也于是納其請以屬思恩密建屯營遣兵列戍梗其出入而右江漸以無事陽明王公田州之役既降府爲州慮岑猛孫芝幼不可立立其季子邦相爲州官頭目盧蘇爲土巡檢統其衆邦相忌芝爲後患而蘇素驍悍利立幼且樹黨思兩除之蘇覺嗾芝

母攜孤走軍門爭立而自與邦相相拒既殺邦相迎立芝諸土酋與猛  
庶子邦佐乘釁構亂朝議令土酋自相擒治而督府先有所入陰爲蘇  
掩罪蘇益橫嘗以兵衛六千人聲言見巡按賓州營城下御史引病不  
出諸司倉猝噤口公曰蘇罪人也何敢爾遣千戶持符逮蘇蘇懼退營  
十五里囚首隨符來公聲色俱厲宣朝廷威令令自計蘇益恐怖請輸  
逋賦斬首虜自贖至叩首丐死久乃許之因勒獄辭列罪狀停各酋官  
職爲請命于朝督府不能奪是時議者以徭撞難制欲割隸土酋以其  
積威可劫又自保分地無外望可恃爲安公執不可且謂之曰朝廷流  
官制徭非不知其勢輕也亦欲用夏變夷不忍化爲異類也今八寨固  
隸土酋未嘗不叛而田州用兵富貴安保吾豈不能拓疆土而願以籍  
寇兵乎議者始訕先是岑瑿以思恩叛朝廷既誅瑿更置守而瑿之餘  
孽金者潛他境至是諸故酋挾以邀我擁衆二千人南寧城下沈參將  
希儀慮爲變召以好語款之俾來見公公令候于賓州而密語沈曰金  
在則無思恩無思恩則廣右必危此不可不除也且其心腹楊留在賓

州爲募兵以往附金金來而留應之是尚有賓州乎今日之事在我與  
公公有胆智而達變吾所不逮惟所命無避也沈知無他腸乃與公計  
故徐徐以他故散遣金衆而後圖之公至賓州犒金牛五輓輓載酒五  
十罌就給之金大喜沈給之曰汝欲得官胡不納我與兵備公金乎金  
訴貧則納帖子爲誣沈復謂曰如兵備公何金曰聞兵備公素不愛錢  
小人不敢沈欲堅其意則以目瞬之曰第以帖子來沈納帖子公公笑  
而密焚之亦更以好語時時款金間出漫語相調金既伏公不疑會御  
史巡柳沈與公說金相隨而沈卒擒金于柳卽又以殺金爲留功而謬  
賞以張之留愧見給又恐爲諸故酋所圍旋憂病死

姚大司馬鏗嘗爲福建按察司副使汀州大昌山賊攻武平八閩震動  
公率鄉兵赴救賊走江西破南豐新淦樂安諸邑永定民賴師智者所  
部五百人無不一當百先爲禦賊戰多死家復爲賊所破有司不知收  
恤遂擁兵自衛不復爲用公召而撫之師智請效死公適改督學政時  
以兵屬副使楊璋始遇賊戰卽北執二裨將以去于是他賊劉龍輩益

猖獗不可制師智乃率壯士擊龍寨大破之斬首三千餘級復得一裨將以歸賊震懼遂遁訖今汀漳數十年無盜皆公力云嘉靖乙酉以右都御史提督兩廣軍務兼理巡撫田州土酋岑猛者初朝廷調征江西之桃源納賊重賂縱賊逸去後猖獗流毒數年猛富甲諸酋遂侵占鄰境屠戮土官納結逆濠抱諸不軌上思恩土酋之叛猛陰主之軍門調遣不復聽命且揚言兩廣本吾土也暫假朝廷終當取之于是巡按御史張鉞江淵內外鎮守重臣奏發其罪調湖廣永保兵勦之公既至兵備單弱倉猝調集兵糧訛言訕訕乃遣使檄徵猛兵弛其謀且諭猛自歸待以不死猛終不聽公乃上疏陳猛愈肆不恭罪在不赦會永保兵至公自督師進破定羅丹梁猛子邦彥率驍將常好陸緩列十營拒戰公師奮前大破之斬好衆潰猛潰奔歸順土官岑璋鳩猛傳首南寧捷奏上嘉公功褒獎進左都御史太子少保及白金文綺之賜磨一子錦衣衛百戶班師遺酋盧蘇招他部王受叛執畧田州事王熊要詔赦于公公謂交南麓川既平復叛姑息致然二囚不誅何以懲後復進請兵

巡按御史劾公失策致再亂又謂猛尙存爲禍非細館閣大臣信之公重得罪矣丁亥公以災異乞休遂致政歸

茅坤字順甫歸安人嘉靖戊戌進士初授青陽令歷官按察副使嘗僉廣西憲事廣西徭撞錯居而府江部稱最險古田夷巢鬼子等砦驚甚時出剽陽朔殺其令朝議大征督府應公檄聞公才檄署府江道屬以兵公策之曰大征非兵十萬不可餉稱之今檄徵諸路猝不可集而賊已走險爲備矣計莫若鵬勦鵬勦者如鵬之搏兔然伏于無形倏入而殲其魁他部落必揣而謀自完此便計也應公曰善于是簡部兵三五千人第爲上中下而差其餽時時椎牛饗士團射角技四出遠徼以爲常賊緩而懈而我兵爭願一戰于是復募死士攜善繪者以藥筆潛圖其山川而聚沙指畫賊在公目中矣乃分所部兵爲七道度道里遠近後先發約同日抵鬼子砦而所過道輒幟而榜曰軍門進十萬兵討某砦之殺陽朔令者他砦毋動動則移兵先滅之我師實不過五千諸夷見旂幟彌山谷且怵于榜皆蟻伏無敢動連破十七砦擒斬百五十人

是日公坐府江帳中令曰捷音至卽鳴鼓左右皆愕視佯應曰諾少選而報鬼子皆捷者三矣蓋以公鵬勳行大征之法密定期會不爽晷刻而左右固不識也捷聞天子如應公大司馬晉公爵三級民爲立祠並祀之

張岳惠安人嘉靖二十六年川湖總督萬鏜勳捕諸苗卽班師鏜筭銅仁苗魁龍許保吳黑苗等復亂焚劫州縣兩省無寧日二十七年公繇兩廣總督侍郎遷右都御史撫勳之開府辰州公至集兩廣官議衆謂林箐深密累討無功撫之便卽不聽撫以兵戍守之使不出掠可也無何賊復攻陷印江縣上切責之公訊前故知撫無益久戍守亦非策乃力主討其湖廣聽撫諸苗令參政王崇如故撫處崇亦撫綏有方苗遂不復叛惟以捕急故深自匿公乃緩其令所屬執親黨盡釋去密督土官索之至三十一年八月土官某廉得其處遣兵劉甫等徑入寨襲斬之持其首煔乾藏之索重賞僉事龍遂給賞驗實齎至軍門公始以竣事聞朝廷集衆議設總督鎮撫其地留公爲之未數年卒加贈諡襄惠



蟻衣生曰諸苗亂萬尚書始集諸路兵稍有斬獲輒班師去何厭兵之過也張襄惠力主用兵不惑撫守之說而陰阻旁撓歷三年始收一戰之功疏報全捷而首惡未擒未幾復出破思州談何容易其後必欲得吳黑苗而後罷兵者豈亦狄青不輕信儂智高之見歟以勞定國以死勤事襄惠無愧矣公掌院事日湖廣苗倡獍初設總督衆方願望莫肯行嚴世蕃請岳當之徐相公階報岳曰士君子爲國任事禍福無擇第其危幾在前冥不知避亦不可謂智也蓋指嚴氏父子云岳謂備國大臣雖危無所避也單車入楚熟計苗情諸撫臣異同前卻而苗出劫日橫上命易貴撫院岳請上曰充國湟中之議初頗嘩于衆口裴度准蔡之役功竟成于獨斷又曰此賊不平臣亦有何面目奉勅書以對將吏于是條上用兵方略詔下報可岳自督戰斬擒苗幾盡土宣慰冉玄等糾苗爲叛苗衆懼誅陰以兵賤龍許保吳黑苗搶思州玄又挾萬金入世蕃幸世蕃去岳而罷兵徐相公執不可竟降兵部侍郎岳生擒龍許保而黑苗尙匿玄所疏玄罪併許其挾金事世蕃益怒日傾岳岳不一

貶復擒黑苗以獻三省底寧兵部力請召岳嚴氏不可岳遂卒是年夏西南大星隕岳曰我當應之卒後三省巡按奏岳功岳復右都賜祭葬贈太子少保諡襄惠蔭子嚴氏擅政二十年制閩不入一錢而得完其身名者僅岳一人耳

龔少司空輝嘉靖二十六年以右都御史提督南贛軍務甫至旁邑同安盜發猖獗公嚴督所屬並鄰境協力夾攻賊隨授首論者以公運籌收功之速不知同安非公屬也繼而懸繩掛坑苦竹大山白葉洞三巨寇劉廷選蕭鐵古陳榮玉等各恃險負固劫掠三省而懸繩尤甚知縣施憲爲下所誤反寄爪牙賊中恣其搏噬以逞公乃行十家保甲法如故事然陰檄漳南嶺北諸道或分布犄角以備聲援或設伏間道公乃檄永保二宣慰及酉陽兵計湖苗助逆者數寨其冉玄助劫思州事公以事狀未明不暴其罪第嚴督賈之未幾各兵擒斬楚苗渠魁數十人餘黨復以搆定田應朝自得巡捕後日益恣橫有司寢不能制既構永保叢又合酉陽兵攻平寨虐殺無辜若干人及官討苗多所撓阻公使

檄使來見不出見漫語應之公廉知應朝雖誦不習技射無武勇其所持從叔田勉驍悍爲之牙拒公先以計執勉數其罪杖之斃于獄應朝乃竄匿苗寨累遣人自列公許之令出立功贖罪久不出乃革其巡捕以事屬鎮溪所諸千戶應朝失巡捕勢益窮諸土官尋讎嫉之其族人亦不直也乃托永順宣撫投見軍門公以時方用兵恐激他變乃杖而釋之令從征暨苗寇破仍以計杖殺之時諸苗略定惟龍許保吳黑苗未獲公檄邦憲等懸賞購之邦憲等密遣使入寨賄令聽撫苗麻得盤吳老獐吳日逞等窺見龍許保至龍田寨所弔喪誘至別寨飲醉而縛之預遣人報邦憲以兵取之去公疏聞誅之諸撫臣任職等欲遂罷兵公持不可謂吳黑苗未誅必爲他日患時黑苗近貴數村寨黨比貴苗龍許保等猖獗公乃大集漢土兵以二十九年九月進兵討之總兵沈希儀參將石邦憲督兵而以貴州副使趙之屏湖廣參政張景賢監之先是銅仁防禦皆邦憲規畫時以印江失事被論制下當解任聽理公歷敘邦憲功次上疏留之自九月進兵至十二月屢破苗寇公乃以疏

報各哨擒斬俘獲近二千餘人從賊首有名者五十人獲龍許保母女妻妾官兵報稱許保已獲第未逮至餘賊逃匿林箐凍餓死者幾盡其巢寨俱已毀拆所窖米燒掘無餘具以捷聞其實許保未獲也遂撤兵止留邦憲等搜捕首惡辛亥二月龍許保吳黑苗復糾合楚貴叛苗出陷思州府或謂四川西陽宣撫冉玄實陰主之思州城中居民不數十家舊有矍塘衛踐更卒戍守時聞苗寇平城守稍怠知府李允簡方視衙苗寇百餘人徐稱矍塘卒更戍突入城殺吏民百餘人掠帑藏執允簡及經歷知事等官去允簡投崖死邦憲聞報亟分遣兵邀其歸路諸苗懼由小徑各遁入林箐邦憲等所遣兵伏諸路邀擊擒斬數十餘人以防奔逸部勒所司各率精銳三路並進後遍揭曉諭使相捕自贖而攜其心一夜兵忽至門遂平懸繩之巢其他二巢漸次勦滅

應少司馬檳嘉靖庚戌兼臺秩提督兩廣軍務巡撫地方桂樂平等地猛撞雜處半爲盜藪而莊頭鬼子簾巢劫令逐帥爲害尤甚其七山三十七巢諸徭密邇軍門據險出沒積五十年餘屢征不服經營者不過

多設營堡遙制而已公至諭以德意不卽加兵而樊家屯馬江等劇賊悉款郊帖服惟七山諸寇負遐阻恬亂自若公審勢察機署勅部伍授諸將方略親督精銳直前奮擊之俘馘以數百計乘勝復攻莊頭鬼子等十五巢生擒百餘斬首二十有奇歸被擄男女二百餘口奪牛馬夷器無算次年征七山三十七巢假道引兵至潯分哨倍道疾趨比至賊倉皇出敵輒敗衄乃棄巢走公招之不從遂張奇夾攻覆其巢封其山籍其田廬畜物什器令官兵屯住耕作殲曠悍之寇而無濫殺之慘因田廬之獲而省轉輸之勞自兩廣用兵以來稱節制之師者無踰公焉東粵有揭嶺自秦屬南海郡稱沃壤編戶之民採山爲茹釣水爲食至終其身老死不知兵革日蕃以息但黃巢石碇大節諸寇積歲爲盜盡桂嶺之屬是爲古田亦桂林象郡之奧區也自先朝縣沒于賊竊據垂八十年吏議棄而不守以爲彈丸黑子之地不足以煩中國也而或者又以時詘鮮任事不二之隸爲解至置盜府庫戕大吏之罪而不問遂棄古縣于遠以棄蠻夷特置廣右撫臣以新安殷正茂爲之兵部左侍

郎南昌李遷節制兩廣軍務兼撫東省爲羅東省撫不設先是兩廣類  
年用兵議者謂莫亟于古田及嶺東諸路迺先後鎮巡諸公與境內縉  
紳之在都下者咸以爲言及李公到鎮復與巡按廣東趙惇巡按廣西  
李良臣疏上本兵乃立主其議令節制兩省者得以便宜從事以隆慶  
四年秋月始事東師則遊擊將軍誠立將長樂之兵按察使張子弘監  
之以參將□濠將程鄉之兵副使江一麟監之總兵□成將邵州之兵  
僉事楊並監之而以成總其事專理糧餉及紀驗功次者則參議許天  
琦西師以遊擊□山都指揮僉事□龍都指揮僉事□國賢將思管風  
門蓮塘之兵參議龔大器監之左參將□應甲右參將□世科將三門  
龍坑之兵副使鄭一龍監之署都指揮僉事□鳳翔將都狼之兵副使  
應存卓監之副總兵□崇文將總府之兵副使邵惟中監之征蠻將軍  
俞大猷實總其事總理軍儲及分理糧餉紀驗功次者則左布政郭應  
聘參政柴君添僉事金貴也當是之時興師十萬飛芻千里旌旗蔽空  
鋒煙相屬蓋已先聲而奪人之氣矣于是破鳳凰涉潮水斬西賊渠率

黃朝猛韋銀豹等以殉得村柵六百五十五處降人率數千斬虜一萬有奇東攻黃巢擊石碛襲大節生擒賊首蘇維相曾魁杜高山等誅之尋又乘勝出奇南走東坑斬獲曾朝元等海豐之界破巢五十斬鹵三千其墜落岩壑塞谿谷中死者無算蓋自兵興以來甫夾旬時而羣兇授首古縣克復其在東則張憲使在西則俞將軍二人之力爲多論者謂其有伏波遺烈焉

西南之夷曰都蠻者流毒于江陽邛夔之間幾易世矣據九絲爲城恃天險而輔以都寨凌霄二蠻自秦漢而後弗能殲也先朝屢勤將吏師出罔功愈益熾于是鎮西將軍都督劉顯以萬歷元年三月大會兵于犍爲夏五月朔攻凌霄城下之擄蠻主以歸我兵乘勝長驅遂迫都寨以六月襲破其巢因遂進攻九絲踰時乃下獲寶鼎二諸葛銅鼓六十有四獻俘闕下

劉司寇自強嘗巡撫四川寇黃中負險獨驚公奉勅會湖湘兵討之屬妖人蔡伯貫乘間煽聚鹵郡縣勢張甚公策曰穴中鼠耳直以泥丸封

之伯賈出柙虎也可急擊勿失輒移師攻賈一鼓殲焉已四兵向中中  
大怖乃所據牛欄坪者險絕甚才通人中夜當道垂巨索屬鈴百餘勤  
卒更番守鈴索一動礮石交下人無免者公斬木百章爲雲梯陽攻之  
微察山旁側有小隙鑿督甲士夜銜枚上鉦鼓並作呼聲震岩谷中黨  
戰栗莫知所出以爲自天而下也不戰而潰

章熙字世曜海陽人嘉靖甲辰進士歷官廣西僉事分道蒼梧知白馬  
三洲故險道也江路逶迤林木深阻諸蠻窟伏爲患久矣公至首咨民  
瘼白于督府檄縣邑治火具大斧長銃之屬以千數因下令調集諸路  
營兵統以偏裨而躬履其地發縱指示度其地勢高下而刊夷之盡伐  
其樹楮其山分兵守焉自是諸蠻奔突竄伏不敢復出

許布政應元在廣西日巨獷者莫氏兄弟凡三人以雄勇名兩粵間往  
數歲嘗大嘯聚破城殺吏討之漏刃去前兵備以獲報而罷兵及是則  
復出猖甚公懲前事計必得因布方略陰部勒購土人決旬而三兇授  
首江道底寧督府將上其功公念事關前兵備且得罪迺力沮不復上



聞者蓋莫不多公

楊憲副逢春嘗爲四川僉事時敘州戎縣都蠻叛殺略吏民長寧戎琪一路邊居無人監司相顧莫肯發口君猶抗言且設禦取之策撫按相與謀非楊僉事不能辦此會檄以都蠻之役委君君至益用耳目知蠻敢爲不靖由屢撫養其驕桀之性非盡勦之後益不可爲遂險阨分兵四路約期進勦君復計蠻素以撫徂我若因而誘之宜必我徂得之易也陽撫其四鄉而以勦二鄉爲師名果得四鄉最桀者四十人以來盡殲之用是兵入有功俘斬以千計

熊桴字元乘武昌人嘉靖庚戌進士歷官副都御史時海寇曾一本反擢僉都御史巡撫廣東馳至南雄一本解圍去因條上平寇四策乞餉金五萬皆得請拊循士民戒守令勿擾行保甲團練法造戰艘百有六十發千金賑貸罷久逋魚鹽課區畫周悉乃與師平嶺西新會藤洞諸賊斬首二千九百尋擊一本于潮海走之入閩疏置二縣報可仍檄安南夷備境上勿令一本南一本分據馬耳澳牛田洋則檄閩兵圍之斬

首三百有奇一本誘日本裨王丘古所寇惠州城脅把總周雲翔殺參將耿宗元攻城急桴縱火擊之雲翔遂行反間丘古所得雲翔等誅之獲古所平其黨斬首一千二百有奇一本驕粵中議且勿擊桴親督諸將進攻斬首虜三千焚溺三萬許一本伏誅桴卒于師上以平寇功進副都御史賜兵部侍郎賜葬

劉廷字伯隣洪洞人嘉靖丁酉山西解元戊戌進士歷官右副都御史嘗爲天津兵備副使時山右妖民肆毒蔓延河間大名之間巡臺下捕治之令甚亟君意驟勦之玉石俱焚給執令者曰此地皆我良民焉有妖賊速除捕治之令衆莫測陰呼謹密幹辦者授以方略賊以令弛謀解竟擒殺之地方以寧

陸少師馬穩爲左右布政使而流賊盧梅林起閩楚之交賊張建起廣之饒補建故縣猾胥也盜官銀覺亡入賊中陰刻石曰飛龍傳國之寶投諸池僞與衆漁得以出衆視之大驚以爲帝王符也于是大埔賊蕭晚羅袍楊舜相與插血推建爲長建自號飛龍人主封袍等皆爲王劫

與寧長樂圍平和使晚屯木窖其黨林贊據南靖爲聲援呂細斷汀漳官兵所出之途袍舜出永定連城絕餉道王伯宣入海導倭夷犯潮州牽我兵不得相救勢猖獗甚辛酉秋八月詔拜公都察院右副都御史提督軍務開府處州合江西之南贛福建之汀漳廣東之雄韶惠潮湖廣之郴州環數千里皆受節制公行至吉安梗于梅林不得前而時朝廷所降兵符猶未至乃以便宜刻關防徵兵討敗之獲梅林暨其黨劉肯王橋進至虔召故提督文成王公所用黃鄉兵屬以討賊九月擒上杭賊占春十月疏請明職掌增軍餉嚴關隘之禁清兵額紕墨吏上皆從之兵威益張遂以十一月討田坑賊梁寧走之檀嶺襲程卿峒賊徐東州執以歸十二月分兵討連城汝內二峒賊斬酋謝文瓚馬東山蕭大生蔡表素焚其巢壬戌春正月麻陽賊袁三犯玉山永豐崇安討誅之二月討賊黃積山于大田峒積山中鳥銃死夏五月會閩廣兵討連公曰志有之攻瑕則堅可瑕而羣賊瓚爲弱宜先也乃首擊瓚瓚果降繼擊袍舜皆就縛公曰兵勢振矣其可後時日夜趣兵往擊晚駭懼

彘措公因使人誘至斬之而潮守何鏗亦誘斬伯宣賊益窮乃令總兵俞大猷擊連連阻險拒守兵不得入公懸重賞購獲連極之盡毀其巢穴捷聞賜白金五十兩彩幣四遷兵部右侍郎兼右僉都御史仍撫其地秋七月討賊黨之遺誅者李楠吳舉曹國清饒表鄧興祖廖選等以爲戮九月合兩廣兵討滅程卿嗣賊林朝曦癸亥又會閩兵遂攻陷興化之倭夷復其城兵前後擒斬賊酋二百餘人賊從萬有奇自用兵以來撫臣獲功之多未有過焉者也

吳司馬文華總制兩廣時昭平賊首黎福旺父子聚衆剽掠執孝廉歐鳴鑿索贖聞公至懼釋之公佯爲不聞令督府徵師討羅旁兵盡東公陰留三千人屬裨將韓文啓掩擊之斬福旺乘夜攻下五指白冒諸峒斬一千三百餘級俘二百餘人捷聞陞俸一級賜金幣隨招撫餘黨二萬餘人卽其地建營堡二十一得田二萬六千餘畝分授新附及諸戍兵事聞賜金幣又以撫降岑溪諸徭功賜金幣蓋一歲中論功受賜者三亦異數也其後比三功尤奇比三者柳州賊巢也聚黨萬餘人慄悍

善騎射號刻馬賊諸將縮縮無敢擾其鋒公策之曰賊強而負固宜智取毋力爭適河池地峭咳有驚公選卒七千餘俾參將王瑞倪中化往勦既得捷卽馳檄諸將曰吾名攻河池耳意固在比三今河池捷比三謂我兵疲且休矣必不我虞可擊也遂督兵分道進賊果不爲備連破七十餘巢斬四千八百級俘獲稱是是役也兵不及萬費不踰千因糧于敵不洽月而蕩累世之巨寇本兵偉其功擬策勳告廟而督府某者相國私人也當公舉事時謀甚祕督府不及聞相國欲以爲督府功度不可乃薄其賞僅賜金幣錄一子太學生

史公記勳字稽叔餘姚人萬曆癸未進士嘗爲重慶太守播州宣慰楊應龍方與黔中七姓夷爲仇則相殺其俗固然而應龍強七姓弱每恣睢殘虐之兩省聞見殊在貴州恆右七姓在四川恆右應龍以是互爭不決而應龍閩庭內頗有不法其所統五司亦每苦應龍侵漁然亦止魚肉其黨而已實非有背叛朝廷意若初時塞其涓涓一獄吏耳第此酋富藏蓋能以賄中人當事者或沒于賄不能爲他則展轉爲說辭以

應而我材官及隸卒輩受命往諭告或□事輒索貨不已彼益厭又諸  
士酋卒愚戇不識文字每倚中土工筆札者爲之謀主此諸猾利其構  
怨則故造不根說鼓動之冀執其命每不欲寧謚又直指奉三尺行部  
見七姓五司所訴應龍罪惡狼籍則憤怒必欲齊以內地法貴州尤甚  
而中丞習知夷情謂彼此相仇殺但思威陰陽之卽得何爲以隋珠彈  
雀以此兩執法持論又每相失久之瑕釁益開則直指說勝公至重慶  
時中丞某公已力主勦奈慮不深以冒進敗而應龍又詭爲不可知漫  
爲好詞謝罪某公旋被言去執樞者懲于寧夏朝鮮之役厭兵聞敗益  
疑懼仍以勘鞫畢役卽中朝請公亦多謂然願此酋見獄辭屢移易無  
究竟時恆慮有他又念唐末來入百餘年中原幾易姓而彼據穴自如  
要無終絕理且岩洞深鳥道危懸度我兵必不能入而其兵爲川中寇  
每征勦必首徵發數十年來軍功皆仗爲鋒益驕曰是無奈我何漸懷  
不軌公揣其情得之堅執勦爲是力自肩任當事者慮爲梗陽推公治  
行謂不宜在還方甲午遂調河南彰德而應龍止罰四萬金禡職用其

子朝棟嗣卽號爲正法論功敘錄矣播酋雖伏罪竟不出罰金己亥遂  
大決裂中外咸主勦追論前事兩省中丞皆削籍藩臬以下或謫或斥  
直指乃白公前被調非是云以主勦故卽徵四方兵搗其穴殲之應龍  
自殺妻孥俘入都人皆服公之卓識

朱公英爲廣東參議時潮賊羅劉寧等屢挫官軍公會兵平之獲被虜  
者數千公別置營以處女婦已而各還其家